

續修曲沃縣志

知縣 張鴻達

纂輯

署知縣 茅丕熙

藝文

言之不文行之不遠經術既深幟拔文苑左言右事視此記

纂志藝文第三十一 著作名目附

奏議

議翼城溫泉十村移割曲沃一縣管轄覆奏

宋部議

推忠協謀同德守正佐理功臣特進行禮部尙書同中書門

下平章事昭文館大學士兼修國史譯經潤文使上柱國河

南郡開國公食邑五千八百戶食實封二千戶臣富弼推忠

協謀同德守正佐理功臣開府儀同三司行工部尙書同中

書門下平章事集賢殿大學士上柱國南陽郡開國公食邑

六千七百戶食實封二千二百戶臣韓琦推忠佐理功臣正

奉大夫尙書禮部侍郎參知政事上柱國廬陵郡開國公食

邑二千一百戶食實封二百戶賜金魚袋臣曾公亮議絳州

比部員外郎李復奏陳溫水人戶分隸曲沃翼城兩縣每多

爭訟澆溉官員各皆黨護不肖盡公理斷以致民心不服乞將曲沃縣界內不使水之北樊下陽合龍三村移隸翼城將翼城縣界內使水之陽城等一十村割屬曲沃庶使水村莊一縣管轄以杜爭端等情奉旨檄據觀察推官張雍翼城縣知縣衛尉寺丞趙袞守縣尉權主簿翟中正曲沃權縣事正平縣主簿張瑋守曲沃縣尉權主簿趙滌公同親詣曲沃翼城兩縣人戶所爭溫水處勾集現今乞割移及使水人戶指引出水源脉通流去處澆溉次第檢閱絳州比部員外郎李復原奏及太平縣知縣太子中舍陳安仁與曲沃翼城知縣

相度擘畫事宜責取得曲沃縣北樊下陽合龍三村百姓楊

海等一百九人狀稱情願割屬翼城縣外取責得翼城縣陽

城等一十村莊百姓李海等一百三十五人狀稱海等先爲

指論曲沃縣前知縣霍著作宅後種麻及爲年滿押司史緒

將白地劫作澆溉今已不得使水并前陞州李復庇護原管

百姓陳奏海等一十村莊割屬曲沃恐後來管轄官員爲見

海等指論前官以此成仇及史緒諸戶倚恃官勢告令海等

不得使水旱損田苗稅賦不前所以不願割屬曲沃今衮等

詳推李復陳奏移割村莊原爲兩縣人戶爭論澆溉官員俱

各黨護故妄一縣管轄今若依從李海等民戶不行割屬難
絕訟源復責取得翼城縣陽城等一十村莊百姓李海等願
割屬曲沃文狀乞特降指揮將曲沃北樊下陽合龍三村不
使水人戶割移翼城縣將翼城縣使水之陽城溫泉莘望石
堆東韓西王村程大保郭員外史推官郇員外一十村莊割
屬曲沃縣一處管轄人戶凜從澆溉均濟不致更有黨護得
以經久便利等情具奏奉旨發交部議臣等公同議得民間
水利自貴公平若依使水人戶分隸兩縣各官黨護民心不
甘勢難杜絕詞源應如趙袞照依李復陳奏移割使水人戶

村莊統歸曲沃一縣管轄實屬利便恭候欽定臣部行文永遠遵行謹奏奉旨依議

請遷蒙城驛爲史村驛疏

山西巡撫
明德

爲懇請改復驛站以均勞逸以速馳遞仰祈

聖鑒事竊照驛站之設原以供應馳遞必須道里適均斯馬力可

無偏累至各省驛站所設人夫本以供扛抬之役若夫馬分

設兩地則接替更換多有未便臣伏查晉省南路驛站中原

有太平縣之史村一廠北至臨汾縣之建雄驛六十里南至曲沃縣之侯馬驛七十里道路遠近原屬適均志載明季將

驛馬移設於曲沃縣之蒙城鎮是爲蒙城驛其廠夫九十名
仍留太平縣之史村向因汾水阻隔馳驅不便是以改隸於
此移設以後於驛路並無妨碍但查蒙城驛北距建雄驛八
十里南距侯馬驛止五十里遠近里數旣屬懸殊馬匹勞逸
又復不均況一驛之夫馬分設於兩縣應付更替殊多未便
且蒙城侯馬二驛向雖俱在曲沃境內然舊有驛丞二員專
司差務今驛丞於乾隆二十年已經裁汰兩驛事務並歸一
縣經管遇有急繁縣令一身奔馳兩地更恐不能兼顧臣委
令河東道率同府縣前往史村確查汾水在西並無阻碍咸

稱改復史村一切應付俱屬妥便

臣

與兩司再四商酌亦謂

循照舊制改復史村於驛站差務大有裨益合無仰懇

皇上天恩將曲沃蒙城驛馬匹仍舊改歸太平縣之史村驛道路
遠近既得適均馬匹厰夫復歸一處則奉差往來之員可免
更替稽延而每縣各管一驛併可親身督率庶驛站可資整
頓差務無虞貽誤矣

臣

愚昧之見是否有當伏乞

皇上睿鑒訓示謹奏奉

硃批如所議行欽此

碑記

創建文廟碑記

嘉祐二年

宋鄉進甯
士教授甯

智希武
邑人

虞夏商周之政亘百十紀功業章章號曰天下之盛王也無
他要一本於學校故米廩序瞽宗類宮之名星爛簡冊家塾
黨庠之制亦繫焉以而教化完備風俗純壹人趨治若下坂
之走丸也刑罰近於不試及衰季孔子毅然有力斯文未喪
戰國權謀相尚儒術不絕若綫絃誦之地寂寞無聲獨孟軻
潛心古道始厯聘齊梁之間重申其教荀卿繼之於後皆羽
翼六經世賴以濟隱秦乘間位欲愚天下之人燔焚典籍使
學者逃難重繭遠去先王正途墜底可爲於邑炎劉旣奮大

樹成均之法卿大夫之才之美由此而出如公孫兒寬之徒
高蹈爵位宜乎文章與三代同風今天子踐祚越三十年循
治古之跡不下漢氏漸仁摩義冠帶萬里雄傑豪俊比肩於
朝廷之上由養之有素也慶厯中詔郡縣立學蓋憂四方耳
目未盡開導曲沃萬家之封也當時居上者慮功計費遂不
克有學逮孫公得邑於此喟然嘆曰今太平在御濬詩書禮
樂之源守宰當承流潤澤苟不驅人於善日遠於罪聖賢之
事或幾乎息矣翌日太學助教吳昌和遂獻其材邑中嚮義
者相繼而至不翅若償其願也因相孔子廟起學舍總六十

間先生弟子各有攸處由朝迨夕幾三十人聞者號爲希濶
吾知夫百里之地靡靡然皆入於治異日復有脫布巾草蹻
之賤翺翔青雲輔翼當世不幸而窮則飽德與義有士君子
之器間里矜式學之誘人如是豈不盛哉與夫鑿池築臺極
遊觀之樂者殊科其存心積慮非俗吏淺聞之所能也進士
許岳等神躍氣揚曰道之行也請予述其狀以告來者

重修文廟碑記

皇統元年

金
史中和

邑人

曲沃舊學始建於前代之嘉祐增廣於崇甯大觀之間規制
宏遠視他邑爲最備逮本朝革命之際毒於兵火煨燼之餘

惟存講堂又復僦爲民舍者幾十年官取其租民侵其地無
敢言者皇統元年良鄉宋公涖任召諸生諭之曰學校所以
育人才厚風俗今乃若此豈不貽鄉老吏民之羞乎吾欲率
僚佐出俸金以助其役將一舉而新之於是申漕司以削其
租按舊址以復其地乃築垣墻新門闕又乃命工陶土以爲
宣聖四配之像采績旣畢聖容雍穆卓然有洙泗之風方將
求大木以構其殿考禮經以制其器爰旣告成憧憧之民過
新學之下者咸以手加額喜見顏色曰我公之德其所以遺
吾民者可謂遠矣昔唐韋景駿嘗宰肥鄉後遷趙州長史道

過肥鄉民爭具酒食以迎犒時有小兒亦在其中韋曰方兒
曹未生吾已去邑非有舊恩而何來對曰耆老爲我言學廬
館舍皆公所治韋公爲留終日是知德澤在民雖厯悠遠有
不能忘者今宋公以長才碩德方進未已他日擁節旄殿方
面或道過新田將見北方之童子爭拜馬前如肥鄉兒曹之
迓韋公矣不亦美乎余將引領而望之矣

重修曲沃縣學宮記

太和二年

金進士

楊普

邑人

學校之地教化之原非良吏莫與興也今雖太宗南渡衍聖
重封正吾道昌明時也而黌宮狹小旋修旋圯甯可觀耶吾

鄉之學皇統間創於宋公歷今纔五十六年耳而正殿講堂
鞠在場圃矣誰實使之也太和改元邑宰獲澤張公主簿平
城翟公皆有儒者氣象銳意興修各捐俸以倡邑人從之工
起仲春告成季秋制度規模無不足垂遠久夫自皇統丙寅
迄今始克大啟爾宇以昌明正道則張翟二公厥功懋矣余
師承卑鄙學植荒落謬叨仙籍忝附禮闈顧此澤宮實爲增
愧然喜文學之將興竊深爲鄉人士慶幸也乎

新修文廟碑記

大德十一年

元教諭

董九德

立庠序興學校必相其地始能以垂久大卑濕幽僻不可久

也湫隘囂塵不可大也曲沃舊廟在縣內地歷宋金四百載
前青烏皆謂宜乾地吉其繇曰學遷於乾歷五百年水流方
位數發盈千至元己巳邑令石抹公見舊學屢圯奮然興修
平陽判官王惲爲作文誌其事旋亦圯卽其文亦不傳邇厥
由來皆因建立非其地耳邑人因舊學廟址出入不正洵不
足以垂久也乃就城西北乾地高明塹塹可以立宏大之規
請於雷提刑相度亦稱善檄前主簿賈公天衢繼以王公德
甯而大德四年縣尹完顏從塘銳意成之旋地震四載歷九
年功竣暨坊植栢用垂久遠於是學果遷於乾矣邑人懽忻

僉曰庠序之設學校之立而今始得其地卽垂五百年而此址當方興未艾也千歲宏規於此兆焉青烏之言不信然哉易曰可久則賢人之德可大則賢人之業其是之謂乎

重修文廟碑記

至正四年

元奎章閣
承制學士 靳

榮

時昌
邑人

魯人爲長府閔子騫曰仍舊貫何必改作孔子聞而善之曰夫人不言言必有中爲傷財以害民也至於廟學崇其垣墉飾其棟宇煩里旅而費財用豈聖人之心哉然而方今之世自中夏暨荒服之外孔子之廟皆有之平王東遷遼平魯衰之時王道弗振亂臣賊子繼踵而作孔子修春秋垂世訓然

後彞倫昭著嗚呼凡有天下者行孔子之道則治違之則亂
治亂所在國家之休戚生民之禍福繫焉所以後世之人被
其德澤淪於骨髓思慕之詠歌之高大其堂室丹碧其桷楹
不如是則不足以妥神是皆出於人情之至公忻忻然而不
能自己者延祐三年秋七月皇帝敕有司以公議道統先後
之傳宜升曾子子思於孟子之上以爲萬世不易之典迄今
餘三十年鮮有奉行者及閩公得中來尹是邑首謁

大成至聖文宣王廟因視殿廡神門與夫講堂學舍僅蔽風雨賢
像繪彩剝落幾盡竦然而言曰不意泮宮之敝以至於斯今